



NATIONAL AIDS COMMISSION
Powered to Conquer HIV and AIDS

**PUO KA MOOKAMELI OA LEKHOTLA LA NAHA LA
KHOKAHANYO EA LITABA TSA HIV LE AIDS MOFUMAHALI
'MANNEHENG MOPELI, 'MOKENG OA BAPHATLALATSI LE
BATLALEHI BA LITABA HOLIM'A TLHOLISANO EA RED
RIBBON MEDIA AWARD O TŠOARETSEOENG NAC
BOARDROOM KA LA 11 PHUPTJANE 2010**

1. Selelekela

Le tla hopola hore selemong se fetileng re ne re kopane ka ona mokhoa ona; 'me ka hlalosa hore leleme le lefubelu le bonahalang hohle moo ho buuang ka HIV le AIDS (red ribbon), ke letšoao la lefatše le supang ntoa khahlanong le HIV le AIDS. E le ho ananela le ho ela hloko boithukhubetso toantšong ea HIV le AIDS, mokhatlo oa machaba oa AIDS, e leng UNAIDS, o ile oa theha khau e bitsoang Red Ribbon Award, e le ho tlotla batho ba itlhomeng pele ka boetapele le ho fana ka bosebeletsi sechabeng khahlanong le HIV le AIDS.

Mafapha a mangata haholo a etsang mosebetsi o tsoileng matsoho toantšong ea HIV le AIDS 'me ho ne ho ka nkoa tlotloa le leng la mafapha ao. Empa rona re le lekhotla la naha le hokahanyang litaba tsa HIV le AIDS, re ile ra etsa qeto ea hore khau ena e fanoe lefapheng la bophatlalatsi kaha re hlokometse hore bophatlalatsi bo ka etsa phetoho e kholo toantšong ea HIV le AIDS kaha bo fihlela karolo e kholo ea sechaba. Khau ena e fua baphatlalatsi e le ho leka ho ntlafatsa mokhoa oo HIV le AIDS li phatlalatsoang ka ona le ho fa bo ralitaba le batlalehi monyetla oa ho ipabola le ho fumana mekhoha e meng e mecha ea ho tlaleha ka HIV le AIDS, e ka tlisang phetoho maphelong a batho.

2. Mooko-tabo oa tlholisano ea 2010.

Khau ena ha e fanoe feela empa e fumanoa ka tlholisano. Tlholisano ena e ile ea khakoloa bocha selemong sa 2008 'me morero ke hore e tšoaroe selemo le selemo. E tsetse pele selemong se fetileng 'me re boetse re ea e thakhola selemong sena. Kopanong e neng e tšoeroe haufinyane pakeng tsa rona re le Lekhotla la naha la khokahanyo ea litaba tsa HIV le AIDS le baokameli ba litsi tsa bophatlalatsi, ho ile hoa sekoa-sekoa hore na ebe ho bonahala khaello e le hokae ha ho phatlalatsoa litaba tsa HIV le AIDS. Ho ile hoa shejoa hore ebe tlholisano ea 2010 e

ka ikamahanya le ntlhakholo efeng ho tse latelang, e leng tsona lintlha-khoho tsa toantšo ea HIV le AIDS: Thibelo (Prevention); kalafo, tlhokomelo le tšehetso (Treatment, care and support), le phokotso ea sekhahla seo HIV le AIDS li amang batho ka sona (Impact Mitigation).

Baokameli ba litsi tsa liphatlalatso ba ile ba fihlela qeto ea hore ho sa ntse ho hlokahala hore ho phatlatsoe ka matla ntlha-kholong ea thibelo, feela ho tsepamisoa maikutlo holim'a phetolo ea boitšoaro (behaviour change). Ka hona bo M'e le bo Ntate, tlholisano ea selemo sena joalo ka se fetileng, e ntse e le holim'a **thibelo**, 'me ho eona re ntse re shebile lehlakore lona leo la phetolo ea boitšoaro ka ha rea tseba hore thibello e mekhahlelo e 'maloa 'me e akha tšebeliso ea likhohlopo, Tlhabollo le tlhahlobo ea HIV, thibelo ea phetiso ea tšoaetso ho tloha ho 'M'a ho ea ho lesea joalo-joalo.

Re le Lekhotla re ile ra ananela khetho eo ea baokameli ba litsi le baphatlatlatsi ba neng ba le teng kaha thibelo ehlile e ka sehlohlolong toantšong ea HIV le AIDS. Ha ho ka thibelo litšoaetso tse ncha tsa HIV, ruri re ka iphumana re fentse ntoa ena 'me sekhahla sa tšoaetso se ka theoha.

3. Mokhoa oa ho kenela tlholisano

Lipallo tsa tlholisano ha lia fetoha 'me li ntse li tšoana le tsa selemo sa ho feta. Ka hona tlholisano e ka keneloa ke bophatlalatsi le boralitaba ba sebetsang ka hare ho naha ea Lesotho, bao mosebetsi oa bona o phatlalalitsoeng litsing tsa bophatlalatsi hona ka hare ho naha nakong ea ho tloha ka la 01 Phuptjane ho fihlela la 05 Pulungoana selemong sona sena. Mekhahlelo ea tlholisano e meraro 'me eona ke mananeo a seea-le-moea, a thelefishini le lingoliloeng ka maselinyane kapa marang-rang(Online). Motho o lumelletsoe ho kenela mokhahlelo o le mong 'me a fane ka mosebetsi o le mong (only one entry). Phatlalatso e ka ba ka Sesotho kapa senyesemane 'me mananeo a lokela ho ba metsotso e mashome a mararo athe lingoliloeng tsona e be lipakeng tsa mantsoe a sekete le makholo a mararo le sekete le makholo a mahlano (between 1300 and 1500 words). Mosebetsi o kenelang tlholisano o lokela hore o tekeneloe ke mookameli oa setsi ho netefatsa hore mosebetsi o joalo o fela o ile oa phatlalatsoa setsing seo.

Ho tla ba le baahloli ba tla khethoa ka mokhoa o tšoanang le oa selemo se fetileng moo ho ileng hoa thonngoa mabitso a batho ba nang le boiphihlelo litabeng tsa bophatlalatsi le tsa HIV le AIDS ke

baokameli ba litsi tsa liphatlalatso 'moho le komiti ea tšebetso ea phetiso ea melaetsa ea HIV le AIDS, e leng balekane ba rona re le Lekhotla la naha la khokahanyo ea litaba tsa HIV le AIDS litabeng tsena tsa bophatlalatsi ba HIV le phetiso ea melaetsa. Mabitso a thonngoeng a fetisetsoa ho mookameli oa Lekhotla ho etsa qeto e kopantseng maikutlo a lihlopha tsena tse peli.

Baahloli ba tla sheba mosebetsi o kenetseng tsholisano ba kopane ka nako e le 'ngoe 'me ba tla sheba mosebetsi ka mong ho latela makhabane a ona ho shebiloe mokhoa o tsebahalang oa bophatlalatsi bo tsoileng matsoho, tsebo e phethahetseng ea HIV le AIDS le sehlooho se tšohluoeng 'moho le phetoho eo mosebetsi oo o ka e tlisang sechabeng seo litaba tseo li fihleng ho sona.

Moputso oa tsholisano ena ke likete tse leshome (10,000 Maloti) mokhahlelong ka mong. Hona ho bolela hore chelete e teng bakeng sa tsholisano ena ke likete tse mashome a mararo (30,000 Maloti). Chelete ena ha e ea fumana bahloli selemong sa ho feta. Ho bile feela ba phetsoang meokho ka ha ba ne ba le haufi le lipehelo. Selemong sena re lebeletse hore chelete le e nke kaofela,'me mohlomong e ka eketseha selemong se tlang.

Bahloli ba tla phatlalatsoa le ho fua meputso mohla letsatsi la machaba la AIDS ka la 01 Tšitoe 2010. Ke nke monyetla ona ho le tsebisa hore melaoana ea tlholisano ena e teng e hlalosang ka botebo mekhoha ea ho kenela tlholisano 'me le tla e fumana bohle.

Ke qetele ka ho ipiletsa hore baphatlalatsi bohle ba nke monyetla ona hore ba ipabole mosebetsing oa bona 'me ba etse phetoho maphelong a Basotho etsoe le se le ile la fumana koetliso litabeng tsena tsa HIV le AIDS. Ke phete ke bontše hore bophatlalatsi ke se seng sa libetsa tse kholo toantšong ea HIV le AIDS 'me re na le tšepo ea hore selemong sena tlholisano e tla ba e matla.

Kea leboha.